


TEZAU LITURGIC
4 NOIEMBRIE

SLUJBA
SF. IERARH
PAVEL
KONIUȘKEVICI,
MITROPOLITUL
TOBOLSKULUI
ȘI ÎNTREGII SIBERII



MINEIUL SFINȚILOR PECERSKĂI-II
KIEV, 2007



Мѣсяца Ноемврія въ 4-й дѣнь Служба иже во святыхъ отцу нашему Павлу, митрополиту Тобольскому, Печерскому чудотворцу

НА МАЛЫЙ ВЕЧЕРНИ,

На Господи возвахъ: **стихиры [на 4], гласъ 8:**

Святителю всечестне, поборниче Цѣркве Христовы, Павле богоглаголиве, милостивно преклоняешися къ ищущимъ твоего заступленія, приходящимъ съ вѣрою къ рацѣ святыхъ мощей твоихъ, дары цѣлебныя подаеши незавѣстно; ты бо заступника и предстателя и цѣлителя, вѣрнии, обрѣтохомъ. **[Дважды.]**

Святителю преблаженне, свѣтлая красото Цѣркве Христовы, Павле богомудре, добродѣтели высокими, яко лѣствицею небовосходною, востѣклъ еси къ Богу, пріяти твоего исповѣданія почесть побѣдную, намъ же оставилъ еси въ наслѣдіе тѣло твое нетлѣнное, источати исцѣленія и прогонити дѹхи нечистыя отъ человѣкъ; тѣмже блажимъ тя, чудотворче предивный.

Святителю достохвальне, столпе непоколебимый Цѣркве Христовы, Павле

богоно́сне, по́стническимъ житі́емъ отъ ю́ности украси́вся, въ Ла́врѣ Печѣрстѣ́й Бо́гу обручи́лся еси́, ино́чествовати усѣ́рдно, та́мо же и поко́й о Христе́ обрѣ́лъ еси́, въ небеса́ всели́вся чи́стою душе́ю тво́ею, тѣ́ло твоѣ́ нетлѣ́нное въ благослове́ніе на́мъ оста́вилъ еси́, исто́чати чудеса́; тѣ́мже хва́лимъ тя́, чудотво́рче предивный.

Сла́ва, гла́сь 6:

Возсія́ луча́ми мно́гихъ чудѣ́сь па́мять тво́я, святи́телю Па́вле, вѣ́рныхъ сердца́ озаря́ючи богоразу́мія свѣ́томъ, ю́же соверша́юще свѣ́тло, тебѣ́, па́стырю до́брый Христо́ва ста́да, хвале́бно взыва́емъ: ра́дуйся, исповѣ́дниче непосты́дннй, о пра́вдѣ свидѣ́тельствова́вый нелицепри́ятно; ра́дуйся, нестяжа́телю и́стинннй, не свое́, а церко́вное досто́яніе храни́вый; ра́дуйся, архіере́евъ украше́ніе и мона́ховъ похвало́. Христа́ Бо́га моли́, спасти́ся душа́мъ на́шимъ.

И ны́нѣ, богоро́диченъ, [гла́сь то́йже:

Богоро́дице, Ты́ еси́ лоза́ и́стинная, возрасти́вшая на́мъ Пло́дь живота́, Тебѣ́ мо́лимся: моли́ся, Влады́чице, со святи́ми апо́столаы поми́ловати ду́ши на́ша].

На стиховнѣ стихиры, гласъ 2. Подобень:

Доме Евфраѳовъ.

Домъ добродѣтелей,* вмѣстилище
смиреномудрїа,* сосудъ Божїа
благодати,* явился еси,* святителю Павле
приснопамятне.

Стихъ: Священницы Твой облекутся въ
правду,* и преподобнии Твой возрадуются.

Дома Божїа страже,* волковъ
душегубительныхъ отгонителю,* благочестїа
учителю,* показался еси,* святителю Павле
богоугодне.

Стихъ: Уста праведнаго поучатся
премудрости,* и языкъ его возглаголетъ судъ.

Дома Владычицы Богородицы,* небеси
подобныя цѣркве Печѣрскїа,* благодатное
украшеніе, гробъ твой нарицаемъ,* цѣлебныя
струи источай отъ него,* святителю Павле
чудодѣйственне.

Слава, гласъ тойже:

Въ малѣ бѣвъ вѣренъ, святителю, надъ
многими превознесся еси Божїею благодатию,
обильно тебѣ дарованною: исцѣляеши души
вѣрою притекающихъ къ тебѣ, яко воистинну
великій тайникъ Святыя Троицы.

И нынѣ, богородиченъ, [гласъ тойже:

Все упованіе мое на Тя возлагаю, Мати Божія, сохрани мя подъ кровомъ Твоимъ.]

Тропарь, гласъ 8:

Православія наставниче, Цѣркве Христовы поборниче, правды нелицепріятный провозвѣстниче, архіереевъ богодухновенное удобреніе, Павле чудотворче, выотою исповѣданія твоего вся ны удивляеши, чудесы же твоими благодатно просвѣщаеши; подвижниче духовный, моли Христа Бога спастися душамъ нашимъ.

[Слава, и нынѣ богородиченъ, гласъ тойже:

Иже насъ ради рождейся отъ Дѣвы, и распятіе претерпѣвъ, Благій, испровергий смѣртію смѣртъ и Воскресеніе явлей яко Богъ, не презри, яже создалъ еси рукою Твоею, яви челолюбіе Твое, Милостиве. Прими рождшую Тя, Богородицу, молящуюся за ны, и спаси, Спасе нашъ, люди отчаянныя.]

НА ВЕЛИЦѢЙ ВЕЧЕРНИ,

**Блаженъ мужъ.., 1-й антифонъ. На Господи
воззвахъ: стихиры [на 8], гласъ 4:**

Яко звѣзда многосвѣтлая, святителю Христовъ, небо Цѣркве Русскія озарилъ еси, исповѣданія

добрѣстїю, нетлѣніемъ мощей твоихъ и многими чудесы: во тмѣ вѣка сего, велю свѣтлость благочестія возсіяваеши, досточудне, и вся ны приводиши блажити тя по достоянію, и вѣрою совершати святую и пречестную память твою. **[Трижды.]**

Яко источникъ многоцѣлѣбный и рѣка многоводная чудесь, святителю Христовъ, Лавру Печерскую орошаеши къ плодоношенію духовному: въ ней бо чуднымъ нетлѣніемъ мощей твоихъ прославился еси, богопріятне, и отъ нихъ многая исцѣленія недужнымъ даровалъ еси, тѣмже любовію совершаемъ святую и пречестную память твою. **[Трижды.]**

Яко скорбныхъ утѣшитель и недугующихъ врачъ безмездный, святителю Христовъ, приходящихъ къ честному твоему гробу, милостивно пріемлещи и дары благодатныя обильно подаеши всѣмъ, требующимъ твоего заступленія, чудотворче благій, тѣмже пѣніи хвалѣбными почитаемъ святую и пречестную память твою. **[Дважды.]**

Слава, гласъ 6:

Апостоловъ преѣмниче, Златоуста подражателю, изгнаніе отъ престола твоего, правды ради, претерпѣлъ еси, отче Павле, дивимся мужеству души твоея и ревности о

Цѣркви Христовѣй: не наемникъ бо былъ еси, но пастырь истиненъ, душу свою полагая за овцы своя, тѣмже ты почитаемъ и ублажаемъ, досточудне.

И нынѣ, богородиченъ, [гласъ тойже:

Кто Тебѣ не ублажитъ, Пресвятая Дѣво? Кто ли не воспоетъ Твоего Пречистаго Рождества? Безлѣтно бо отъ Отца возсіявый Сынъ Единородный, Тойже отъ Тебѣ, Чистыя, пройде, неизреченно воплощся: естествомъ Богъ Сый и естествомъ бывъ Человѣкъ насъ ради; не во двою лицу раздѣляемый, но во двою естеству неслитно познаваемый. Того моли, Чистая Всеблаженная, помилватися душамъ нашимъ].

**Входъ. Прокименъ дне и чтенія три.
Притчей чтеніе.**

Память праведнаго съ похвалами, и благословеніе Господне на главѣ его. Блаженъ человекъ, иже обрѣте премудрость, и смертенъ, иже увѣдѣ разумъ. Лучше бо сію куповати, нежели злата и сребра сокровища. Честнѣйшая же есть каменій многоцѣнныхъ, все же честное недостойно ея есть. Долгота бо дней и лѣта живота въ десницѣ ея, въ шуйцѣ же ея богатство и слава. Отъ устъ ея исходитъ правда, законъ же и милость на языкѣ носить. Послушайте убо мене, о чада, честная бо реку, и блаженъ

человѣкъ, иже пути моя сохранитъ: исходи бо мой — исходи живота, и уготовляется хотѣніе отъ Господа. Сего ради молю васъ и предлагаю мой гласъ сыновомъ человѣческимъ. Яко азъ, премудрость, устроихъ совѣтъ, и разумъ и смыслъ азъ призвахъ. Мой совѣтъ и утверждѣніе, мой разумъ, моя же крѣпость. Азъ менѣ любящія люблю, ищущи же менѣ обрящутъ благодать. Разумѣйте убо, незлѣбиви, коварство, ненаказаніи же, прилагайте сердца. Послушайте менѣ и паки, честная бо реку, и отверзу отъ устенъ правая, яко истинѣ поучитъ гортань моя, мерзки же предо мною устны лживыя. Съ правдою вси глаголы устъ моихъ, ничтоже въ нихъ стропотно, ниже развращенно. Вся права суть разумѣвающимъ и проста обрѣтающимъ разумъ. Научаю бо васъ истинѣ, да будетъ о Господѣ надежда ваша, и исполнитесь Духа.

Премудрости Соломона чтеніе.

Уста праведнаго каплють премудрость, устнѣ же мужей мудрыхъ вѣдятъ благодать. Уста мудрыхъ поучатся премудрости, правда же избавляетъ ихъ отъ смерти. Скончавшуся мужу праведну, не погибнетъ надежда. Сынъ бо праведенъ раждается въ животъ и во благихъ своихъ плодъ правды обьиметь. Свѣтъ праведнымъ всегда, и отъ Господа обрящутъ благодать и славу. Языкъ мудрыхъ добрая

свѣсть, и въ сѣрдцѣ ихъ почіеть мѹдрость. Любитъ Господь преподобная сердца, пріятни же Емѹ вси непорочни въ пути. Мѹдрость Господня просвѣщаетъ лице разумнаго: постигаетъ бо желающія ю, прѣжде даже разумѣти ю, и удобь узрится отъ любящихъ ю. Утреневавый къ ней не утрудится, и бдяй ея ради вскорѣ безъ печали будетъ. Яко достойныхъ ея сама обходитъ, ищущи, и во стезяхъ ея являється имъ благопріемнѣ. Мѹдрости никогдаже одолѣетъ злоба. Сихъ ради и рачитель быхъ доброты ея, и возлюбихъ ю, и поискахъ отъ юности моея. И взыскахъ невѣсту привести себѣ, яко всѣхъ Владыка возлюби ю. Тайбница бо есть Божія хитрости и обрѣтательница дѣлъ Его. Труды ея сѹть добродѣтели: цѣломѹдрию же и разуму та учитъ, правдѣ и мѹжеству, ихже потребнѣе ничтоже есть въ житіи человѣкомъ. Аще же и многаго искуства желаетъ кто, вѣсть дрѣвняя, и быти хотящая разсмѹтритъ. Свѣсть извѣтія словесъ и разрѣшенія гаданій, знаменія и чудеса проразумѣетъ, и сбытія временъ и лѣтъ, и всѣмъ совѣтникъ есть благъ. Яко безсмертіе есть въ ней и благославіе во общеніи словесъ ея. Сего ради бесѣдовахъ ко Господу, и помолихся Емѹ, и рѣхъ отъ всего сѣрдца моего: Боже отцевъ и Господи милости, сотвори выи вся словомъ Твоимъ и мѹдростию Твоею устрой выи человѣка,

да владѣть бѣвшими отъ Тебѣ тварьми и да управляетъ мѣръ въ преподобіи и правдѣ. Дажьди ми Твоихъ Престо́ловъ присѣдѣющую премудрость и не отлучи мене отъ отро́къ Твоихъ, яко азъ ра́бъ Твой и сынъ рабыни Твоея. Посли́ ю съ Небѣсъ отъ святаго жилища Твоего́ и отъ Престо́ла славы Твоея, да, сущи со мною, научи́тъ мя, что́ благоугодно е́сть предъ Тобою, и наста́витъ мя въ ра́зумъ, и сохрани́тъ мя въ сла́вѣ своей. Помышленія бо смѣртныхъ вся боязлива и погрѣшительна умышленія ихъ.

Премудрости Соломо́ни чтѣніе.

Похваляему праведнику, возвеселятсѣ людіе: безсмѣртіе бо е́сть па́мѣть его́, яко отъ Господа познава́ется и отъ челове́къ, и уго́дна Господеви душа́ его́. Возлюбите́ убо, о мужіе, му́дрость и поживете́: восхо́дите ея́ и наказани́ будете. Нача́ло бо ея́ любви́ и соблюде́ніе зако́на. Почтите́ премудрость, да во вѣки ца́рствуете. Возвѣщу́ вамъ и не скрѣю отъ васъ таи́нъ Бо́жихъ, яко Той му́дрости наста́вникъ е́сть, и му́дыхъ исправитель, и всякому́ смы́слу и дѣлу хитре́ць. И всѣмъ смы́сломъ научи́тъ му́дрость, е́сть бо въ ней Ду́хъ разу́менъ и свѣтъ, и сія́ніе свѣта присносу́щнаго, и о́бразъ бла́гости Бо́жія. Та́я дру́ги Бо́жія и проро́ки устрае́тъ, благолѣ́пнѣйши же е́сть со́лнца и па́че всякаго сотворе́нія звѣздъ, свѣту сосужда́ема, обрѣта́ется

пéрвѣйши. Тая угождающихъ ей отъ болѣзни
избави и настави на стези правыя. Дадé имъ
разумъ имѣти святъ, и сохрани я отъ ловащихъ,
и подвигъ крѣпокъ подадé имъ. Да разумѣютъ
вси, яко сильнѣйши всего естъ благочестіе, и
никогдаже преможетъ злоба мѹдрости, ниже
прéйдетъ злыя обличающи сѹдь. Рекоша же въ
себѣ, помысливше неправедно: насильствуемъ
праведному, и не пощадимъ преподобства его,
ни усрамимся сѹдинъ старости многолѣтны.
Бѹдетъ бо намъ крѣпость — законъ и уловимъ
праведнаго, яко неугоденъ намъ естъ, и
противится дѣломъ нашимъ, и поноситъ намъ
отпаденіе закона, и обличаетъ намъ согрѣшенія
наказанія нашего. Возвѣщаетъ намъ разумъ
имѣти Божій, и отрока Господня себе именуеть.
Бысть намъ на обличеніе помышленій нашихъ и
тяжекъ намъ естъ и видимъ, яко неподобно
инымъ житіе его, и измѣнены стези его. Въ
поруганіе вмѣнихомся ему, и удаляется отъ
путей нашихъ, яко отъ нечистотъ, и блажитъ
последняя праведныхъ. Увидимъ убо, аще
словеса его истинна сѹть, искусимъ, яже
сбываются ему. Руганіемъ и мукою истяжемъ
его, да разумѣемъ кротость его и искусимъ
беззлобство его, смѣртію безобразною осудимъ
его, бѹдетъ бо посѣщеніе отъ словесъ его. Сія
помыслиша и прельстишася, ослѣпи бо я злоба

ихъ, и не разумѣша тайнъ Божіихъ и не разсудиша, яко Ты еси Богъ единъ, живота имѣяй и смѣрти власть, и спасаая во время скорби, и избавляая отъ всякаго зла. Щедръ и Милостивъ, и даая преподобнымъ Своимъ благодать, и Своєю мышцею гордымъ противляяся.

На литіи стихіры, гласъ 2:

Приидите, вѣрнии, ублажимъ святителя и чудотворца Павла, въ послѣдняя наша лѣта доблестію исповѣданія просіявшаго, и чудесы многими отъ Господа прославленнаго: въ ризу бо нетлѣнія свѣше облечеса, и цѣлебныя дары источаетъ отъ мощей своихъ святыхъ. Духовнѣ красуйся, Лавро Печѣрская, стяжавши въ себѣ таковаго свѣтильника, истиннаго Христова угодника, молитвами своими подающаго міру велію милость.

Имѣя дерзновеніе ко Господу, святителю отче нашъ Павле, проси отечеству твоему умирѣнія, паствѣ твоей благоустроѣнія, Лавръ Печѣрстѣй, тобою возлюбленнѣй, благодатнаго преуспѣянія, и всѣмъ намъ, любовію чтущимъ тя, мирнаго богоугоднаго житія и велія милости.

Во всю зѣмлю Русскую изыде слава чудесъ твоихъ, святителю Павле, егда мѣщи твоя, благоволеніемъ Вседержителя Бога, нетлѣнни

обрѣтошася: по мнозѣхъ бо лѣтехъ, во гробѣ лежашу ти, тлѣніе не дерзну прикоснутися твоей плоти, ниже самимъ одѣждомъ твоимъ, преподобне, тако прославльшу тя Христу Богу, у Негоже проси намъ мира и велія милости.

Слава: гласъ 8:

Пастырю предобрый, столпе и красото Русскія Цѣркве, Павле достохвальне, ты священники освящаль еси, заблудшія исправляль еси, обидимыхъ былъ еси предстатель, вдовъ и сиротъ приближище, и всей паствѣ твоей благочестія учитель; тѣмже хвалимъ тя, и молимся прилжно: моли Христа Бога спасти души наша.

И нынѣ, богородиченъ, [гласъ тойже:

Безневѣстная Дѣво, Яже Бога неизреченно зачѣнши плотию, Мати Бога Вышняго, Твоихъ рабовъ мольбы приими, Всенепорочная, всѣмъ подающи очищеніе прегрѣшеній, нынѣ наша моленія приѣмлющи, моли спастися всѣмъ намъ].

На стиховнѣ стихиры, гласъ 2. Подобенъ:

Кіими похвальными.

Кіими достойными похвалами* ублажимъ святителя Павла?* Новаго исповѣдника Цѣркве Русскія* и предивнаго чудотворца,* нетлѣнія прозябеніе прекрасное* и молитвенника богопріятнаго,* егоже небесными

молітвами,* Христось Бѳгъ, благоувѣтливъ намъ
бывааетъ,* и даруетъ велию милость.

Стихъ: Честна предъ Господемъ* смѣрть
преподобныхъ Его.

Кіими пѣсенными добрѳтами* прославимъ
святителя Павла?* Егоже слава не отъ человекъ,
но отъ Бѳга* назнаменася нетлѣніемъ и
чудесы,* источника исцѣленій
благодатныхъ,* милости подателя* и скорбныхъ
утѣшителя любвеобильнаго,* молящася
непрестанно у престола Христа Бѳга,* даровати
намъ отъ враговъ избавленіе,* и велию милость.

Стихъ: Праведникъ яко финиксъ
процвѣтетъ,* и яко кедръ, иже въ Ливанѣ,
умножится.

Кіими побѣдными вѣнцы* увяземъ святителя
Павла?* Добраго воина Христова,* не убоявшася
гнѣвавшихся неправедно о правдѣ Бѳжіей,* и
противуставша нарушителемъ правилъ Святыя
Цѣркве,* еяже достояніе охраняя,* изгнаніе отъ
престола святительскаго радостно пріять;* того
молітвами, Христѣ Бѳже,* даруй Цѣркви Твоей
миръ и велию милость.

Слава, гласъ 3:

Святителю всечестне, правило вѣры
истинныя, образе мужества високаго, отче
нашъ Павле, постническимъ житіемъ

блaгoукрaсiвcя, къ лику преподобныхъ Печёрскихъ сопричёлся еси, съ нимиже престолу Владычню предстоя, моли Христа Бога, даровати намъ прегрѣшеній прощєніе, и душамъ нашимъ миръ и велію милость.

И нынѣ, богородиченъ, [гласъ тойже]:

Безъ сѣмене отъ Божественнаго Духа [волею же Отчею зачала еси Сына Божія, отъ Отца безъ матери прежде вѣкъ суща, насъ же ради, изъ Тебѣ безъ отца бывша, плотию родила еси и Младенца млеко́мъ пита́ла еси. Тѣмже не преста́й моли́ти изба́виться отъ бѣдъ душамъ нашимъ].

[На благословєніи хлѣбовъ: Тропарь святителя, дважды [писанъ на малѣй вечерни] и Богородице Дѣво.., единойды.]

НА УТРЕНИ,

[На Богъ Господь: Тропарь святителя, дважды. Слава, и нынѣ, богородиченъ.]

По 1-мъ стихословіи съдаленъ, гласъ 1:

Яко украшеніе драго́е, имать тя Лавра Печёрская, святителю Павле: въ ней бо сокровище нетлѣнныхъ моцѣй твоихъ храни́мо е́сть, отъ нихже исцѣленія преславно источаеши, яко тайникъ Божія благодати. **[Дважды.]**

Сла́ва, и ны́нѣ, богоро́диченъ:

Всѣхъ Творца́ и Влады́ку, Бо́га же и Содѣ́теля, Всенепоро́чная Чи́стая, Ду́хомъ Божѣ́ственнымъ въ ло́жесна́хъ заче́нши, нетлѣ́нно роди́ла еси́, Егѡ́же сла́вяще, Тя́ велича́емъ, Дѣ́во, я́ко пала́ту всѣхъ Ца́ря, и ми́ра защище́ние.

По 2-мъ стихослѡвіи сѣда́ленъ, гласъ 1:

Сто́лпъ непоколебимъ́ пра́вилъ церко́вныхъ бы́лъ еси́, святи́телю Па́вле приснопа́мятне, егѡ́же вѣ́три суемуд́рія чело́вческаго поколеба́ти не возмо́гоша, тѣ́мже ны́нѣ бога́тство некра́домо исцѣ́леній яви́ся грѡ́бъ тво́й, блаже́нне, моли́твенниче о ду́шахъ на́шихъ. **[Два́жды.]**

Сла́ва, и ны́нѣ, богоро́диченъ:

Ра́дуйся, златокова́нная ча́ше, Пречи́стая Дѣ́во, въ не́йже вино́ спаси́тельное отъ Ду́ха Свята́го на́мъ раство́рися, егѡ́же пи́ющи ктому́ не умира́ють: безсме́ртія бо ви́новное Сло́во роди́ла еси́, на ра́дость на́мъ вѣ́чную.

По поліеле́и сѣда́ленъ, гласъ 8:

Воздержа́ніемъ отъ ю́ности твоея́ плѡ́ть ду́ху покори́лъ еси́, о́тче, мона́хъ и́стиненъ бы́лъ еси́ нелице́мѣрно, и просвѣ́тився богому́дрія уче́ніемъ, святи́тельства оде́ждею досто́йно украси́лся еси́, Па́вле богоно́сне, ны́нѣ со

святители престо́лу предсто́я Христо́ву, моли́ся о душа́хъ нашихъ. **[Дважды.]**

Сла́ва, и ны́нѣ, богоро́диченъ:

Отъ любве́ душе́вныя вопію́ Ти, Влады́чице: моле́ніемъ богоуго́днаго святите́ля Па́вла, въ оби́тели Твоёй Пече́рствѣй чуде́сы просія́вшаго, преклони́ся на ми́лость ко мнѣ́ недостойно́му, моли́тву приими́, Всеблагая́, со смире́ніемъ Тебѣ́ приноси́мую отъ болѣ́зненныя души́, и бу́ди ми́ здравіе и спасе́ние.

Степе́нна, 1-й антифо́нъ 4-го гласа.

Проки́мень, [гласъ 4]: Честна́ предъ Го́сподемъ* сме́рть преподо́бныхъ Его́. **Стихъ:** **Что́** возда́мъ Го́сподеви о всѣ́хъ, я́же воздаде́ ми? **Ева́нгеліе отъ Ио́анна, зача́ло 35 отъ полу́.**

По 50-мъ псалмѣ́ стихи́ра, гласъ 6:

Божество́нная благода́ть осъня́етъ гробъ тво́й, святите́лю о́тче нашъ Па́вле, и дѣ́йствуетъ во спасе́ние приходи́щихъ къ тебѣ́ съ вѣ́рою: я́ко боля́щія исцѣ́ляеши, разсла́бленныя укрѣ́пляеши, слѣ́пыя просвѣ́щаеши и бѣ́сы отъ чело́вкъ прогоня́еши, чуде́са изли́ваеши прикаса́ющимся мо́щемъ твои́мъ святы́мъ; тѣ́мже ты́, цѣ́лебниче безме́здный, почита́емъ и ублажа́емъ.

Канонъ [Богородицы со ирмосомъ на 6, и святителя на 8], гласъ 6, егѣже краегранесіе:

Пою Церкви побѣрника святителя Павла.

Пѣснь 1.

Ирмосъ: *Яко по сѹху пѣшешествовавъ Израиль по безднѣ стопами, гонителя фараона видя потопляема, Богу побѣдную пѣснь поимъ, вопіяше.*

Прими, святче Божій, пѣніе хвалебное, отъ истиннаго усердія тебѣ приносимое, и простри молитвенныя длани твоя ко Господу, прося намъ осіянія благодатнаго свѣше, да твоё богоугодное житіе вѣрно прославимъ, Богу, въ тебѣ прославльшемся, побѣдную пѣснь воспѣвая.

Отъ юности твоея, отче Павле, постническое житіе возлюбилъ еси, ученіи богодухновенными просвѣтивъ твой смысль, содѣлался еси сосудъ избранъ Божія благодати, яже ты возвыси на степень святительскую, яко достойнаго Богу побѣдную пѣснь воспѣвати.

Юношескія страсти обуздавъ воздержаніемъ, въ Лаврѣ Печерстѣй благій ярёмъ Христовъ на рамо твоё возложилъ еси, Павле преподобне, инокъ бѣвъ нелицемѣренъ, во смиреніи дѹха Богу побѣдную пѣснь воспѣвавый.

Богородичень: Царя Небеснаго, на херувимѣхъ сѣдящаго, и серафимы

повелѣвающаго, престоль явилася еси, Богородице, къ Немуже дерзновение Матернее имѣючи, проси намъ у Его благодости грѣховъ прощѣнія и житія исправленія, да тебѣ благодарное пѣніе воспѣваемъ.

Пѣснь 3.

Ирмосъ: *Нѣсть святъ, якоже Ты, Господи Боже мой, вознесый рогъ вѣрныхъ Твоихъ, Блаже, и утвердивый насъ на камени исповѣданія Твоего.*

Естества челоѣческаго немошь познавая, молитвами непрестанными къ Богу, силу свѣше пріялъ еси, подвиги духовныя непреткновѣнно проходить, на камени вѣры утвердивъ, отче Павле, твое боголюбивое сердце.

Разумъ твой богословіемъ Православныя вѣры украсилъ еси, Павле богоносе, соименному ти апостолу Христову внимая съ любовію, и того ученія полагая яко правило жизни, достигль еси исполненія духовнаго, въ Бозѣ утвердивъ твоя помышленія.

Къ источнику сладостному евангельскаго ученія, яко елень на источники водныя, потекль еси, Павле богомудре, и яко древо, при водахъ возрасшее, плодъ много о Христвѣ принесль еси Святей Цѣркви, яже естъ столпъ и утверждение истины.

Богородиченьъ: Во многія и лютыя беззаконія впáдшія ны, Владычице Прeблагая, избави отъ плѣна страстей, и въ страну безстрастія приведи, рукою Твоею державною, утвердивъ наша сердца на камени заповѣдей Сына Твоего и Бога.

Съдалень, гласъ 6:

Помышляя тя, святителю, въ чертозѣ небеснѣмъ Царя, Христа и Бога, славою и честию увѣнчаннаго, уязвляюся сердцемъ, тоя же доброты желаючи, но увы мнѣ окаянному, чуждому дѣлъ твоего житія благаго, недостойному спасенія вѣчнаго, ты самъ, преблагій отче, возри на мя погибающаго, и руку помощи твоея мнѣ простри, богатствы твоими воспольни мою душевную скудость, и покажи мя наследника Царства Христова. **[Дважды.]**

Слава, и нынѣ, богородиченьъ:

Связанъ многими нынѣ пленицами грѣховъ, и содержимъ лютыми страстьми и бѣдами, къ Тебѣ прибѣгаю, моему спасенію, и вопію: помози ми, Дѣво, Мати Божія.

ПѢСНЬ 4.

Ирмосъ: Христось моя сила, Богъ и Господь, честная Церковь боголюбно поетъ, взываючи, отъ смысла чиста, о Господь празднующи.

Истинный рабъ Христа Спасителя былъ еси, святителю богоблаженне, на Того бо выну взирая умными очесы сердца, жизнь твою въ заповѣдехъ Его совершилъ еси, смысломъ чистымъ испытуюя тайны, въ Законъ Божіемъ сокровенныя, и достойнымъ открываемыя отъ Господа.

Преподобіемъ и чистотою украсився измлада, святителю Павле, на престолъ архіерействъ поставился еси отъ Пастыреначальника Іисуса, яко свѣтильникъ горяй и свѣтяй; молитвами твоими, святе, освѣти и наша мрачныя души, да помощію твоєю узримъ свѣтъ спасенія о Господѣ.

Отъ юга Россіи возраслъ еси, отче, яко вѣтвь благоплодная, и въ сѣверную Сибірскую страну посланъ былъ еси пасти стадо Христово: Тобольская всеосвященная Церковь тя пастыря добраго стяжа, поборника и защитника ея достоянія.

Богородиченъ: Въ Тебѣ, Чистая, исповѣдуемъ во двѣ естеству быти, во единомъ прекрасно соединившіяся спасенія ради нашего. Того моли,

Благода́тная, раздѣ́ленныя ны́ грѣхопаде́ньми
отъ Его́ благода́ти, па́ки соедини́ти съ Собо́ю
та́инствами свята́я Цѣ́ркве.

Пѣ́снь 5.

Ирмо́сь: *Бо́жиимъ свѣ́томъ Твои́мъ, Бла́же,
у́тренюющихъ Ти́ ду́ши любо́вию озари́, молю́ся,
Тя́ вѣ́дѣти, Сло́вь Бо́жій, и́стиннаго Бо́га, отъ
мра́ка грѣхо́внаго взыва́юща.*

Отъ и́стинныя любве́ къ Бо́гу и Его́ свята́й
Цѣ́ркви, святи́телю Па́вле, не терпѣ́ль еси́ взя́тія
церко́внаго досто́янія, но се́му́ му́жески
противуста́ль еси́, изгна́ніе отъ престо́ла твоего́
претерпѣ́въ, я́ко вои́стинну исповѣ́дникъ пра́вды
Бо́жія.

Разумѣ́вши отъ видѣ́нія свѣ́ше твоего́ по́двига
пра́вость, Благовѣ́рная Цари́ца, по желанію
твоему́, святи́телю Па́вле, въ Ла́вру Пече́рскую
жи́тельствовати тя́ посыла́етъ, да идѣ́же
постриже́нь бы́ль еси́ во ино́чество, та́мо
сконча́еши живо́тъ тво́й въ по́двизѣхъ поста́ и
МОЛІ́ТВЫ.

Нищету́ духо́вную возлюбивъ, о́тче богому́дре,
зла́то, Цари́цею тебе́ по́сланное, прія́ти не
восхотѣ́ль еси́, до́ндеже не бы́сть оно́ назначено
на благу́ю потре́бу Ла́вры Пече́рскія, въ не́йже
па́че зла́та дражайшія, честву́емъ ны́нѣ твоя́
многочѣ́лебныя мо́щи.

Богородичень: Изумѣваетъ всякъ умъ
человѣческой, Твоего приснодѣвства велию тайну
постигнути, Богородице, како въ рождествѣ, и
по рождествѣ, дѣвство сохранила еси нетлѣнно,
тѣмже, испытаніе суетное о семъ отвергше,
православно и несомнѣнно Матерь Дѣву Тя
исповѣдуемъ, молимтиса прилѣжно: въ чистотѣ и
цѣломудріи насъ утверди, Всеблагая.

Пѣснь 6.

Ирмосъ: Житѣйское море, воздвизаемое зря
напастей бурю, къ тихому пристанищу
Твоему притекъ, вопію Ти: возведи отъ тли
животъ мой, Многомилостиве.

Къ лику преподобныхъ отецъ Печѣрскихъ
причтенъ быти сподобился еси отъ Господа,
святителю Павле, Иже яви намъ твоя нетлѣніемъ
процвѣтшія мѡщи, и чудесы отъ нихъ
истекающими всѣхъ увѣряетъ, яко войстину
угодникъ еси Божій, и молитвенникъ
многомощный о душахъ нашихъ.

Аще и въ послѣдняя лѣта пожилъ еси,
святителю преподобне, но съ древними святыми
соравнился еси дарми исцѣленій, яже источаютъ
намъ твоя святыя мѡщи, яко цвѣтъ райскій,
благоуханіемъ святыни услаждающія души
наша.

Свѣтомъ небеснымъ осіянный явился еси, святче Божій, Кіевскому митрополиту Евгенію, ему повелѣвъ, да обрѣтенный гробъ твой оставишь въ покои. Тѣмже со слезами многими и усерднымъ моленіемъ, припадѣ онъ къ твоимъ тѣлнѣю непричастнымъ мощемъ, во всеуслышаніе исповѣдуя твоѣ посѣщеніе.

Богородичень: Въ пучинѣ моря житейскаго люте бѣдствуемъ, и боящися потопленія грѣховнаго, къ Тебѣ, Мати Божія, вопіемъ отъ души: помози намъ, и непусти погрузитися въ пропасть погібели, но изведи насъ, Благая, на злѣчную пажить спасенія, да славимъ молитвъ Твоихъ силу, и благословимъ имя Твоѣ во вѣки.

Кондакъ, гласъ 8:

Вышнія красоты желая, святителю Павле, въ мѣръ премѣрно пожилъ еси, нищетою, воздержаніемъ и непрестанными молитвами предочищая себе къ небеснѣй славѣ. Цѣркве поборникъ бывъ, правды ради Божія многія скорби претерпѣлъ еси, и исповѣданія доблестію украшенъ, вшелъ еси въ радость Господа твоего, Егже моли непрестанно о всѣхъ насъ.

Икосъ:

Подражавый соименному ти апостолу языковъ въ небоязненномъ исповѣданіи, святителю

Па́вле, не убо́ялся еси́ гнѣвавшихся на тя си́льныхъ міра сегó, но о правдѣ Бо́жіей му́жески свидѣ́тельствовалъ еси́ предъ ними; сегó ра́ди престо́ль тво́й святи́тельскій остави́ти прину́ждёнъ бы́лъ еси́, и мно́гія ско́рби претерпѣ́въ крѣ́пости ра́ди исповѣ́данія твоего́, въ Лаврѣ́ Печерстѣ́й тихое приста́нище спасе́нія себѣ́ обрѣ́лъ еси́, идѣ́же свято сконча́въ жи́знь земну́ю, ко Го́споду прешѣ́лъ еси́ въ селе́нія святы́хъ, но, я́ко имѣ́яй дерзнове́ніе у престо́ла Христо́ва, моли́ся непреста́нно о всѣ́хъ насъ.

Пѣснь 7.

Ирмо́сь: *Росода́тельну́ убо, пе́щь содѣ́ла а́нгель преподо́бнымъ отроко́мъ, халде́и же опаля́ющее вель́ніе Бо́жіе, мучи́теля увѣща́ вопи́ти: благослове́нь еси́, Бо́же оте́ць нашихъ.*

Яко звѣ́зда путево́дная свѣ́тиши всѣ́мъ, хотя́щимъ жи́ти въ преподо́би и чистотѣ́, святи́телю о́тче нашъ Па́вле, оста́вивъ бо престо́ль тво́й святи́тельскій, въ Лаврѣ́ Печерстѣ́й ре́вно́стно подвиза́лся еси́ въ бдѣ́ніихъ, поще́ніихъ и моли́твахъ непреста́нныхъ, во умерщвле́нномъ тѣлеси́ сла́дць воспѣ́вая: благослове́нь еси́, Бо́же оте́ць нашихъ.

Тихо и богоу́годно сконча́въ жи́знь твою́ земну́ю, святи́телю, я́ко пше́ница зрѣ́лая, пожа́ть

быль еси и преставился еси въ небесную житницу Христо́ву, въ радость вѣчную святы́хъ, идѣже подвигомъ твоимъ воздаяніе блаженное пріявъ, со безплотными зовещи: благословенъ еси, Бо́же отецъ нашихъ.

Исполнися на тебѣ, о́тче, рече́ніе Христо́во: блаже́ни изгна́ни правды ра́ди, я́ко тѣхъ е́сть Ца́рство Небе́сное. Се́ блаже́нъ еси́ вои́стину, блаже́нство Ца́рствія Христо́ва унаслѣдивый, и отъ страны́ изгна́нія, въ оте́чество небе́сное восприя́тый благода́тію челове́колюбца Бо́га, Емуже во гласъ ра́дованія и хвалёнія вопіеши: благословенъ еси́, Бо́же отецъ нашихъ.

Богородиченъ: Тебе́ неодо́лимую стѣну, и спасе́нія ходатаи́цу стяжа́хомъ, Богороди́це Дѣво; Тобо́ю хвали́мся, смире́ннии и грѣшнии, иму́ще Тя покрóвъ и за́щиту отъ враго́въ нашихъ; Тебѣ́ у́бо мо́лимся, Влады́чице, помози́ рабо́мъ Твоимъ, и изба́ви насъ отъ поги́бели вѣчныя.

Пѣснь 8.

Ирмо́сь: *Изъ пла́мене преподо́бнымъ рóсу источи́ль еси́ и пра́веднаго жёртву водо́ю попали́ль еси́: вся́ бо твори́ши, Христе́, то́кмо е́же хотѣ́ти. Тя́ превозно́симъ во вся́ вѣ́ки.*

Его́же возлюбилъ еси́, Его́же ра́ди и подви́залься еси́, святите́лю, Христо́съ Госпо́дь,

То́й воздаде́ тебѣ́ ще́дрою руко́ю мзду́ небесную́,
и́ яко́ вѣ́рный ра́бъ Его́, вше́лъ еси́ въ ра́дость
черто́га Его́ пресвѣ́тлаго, и́дѣ́же не забу́ди на́съ,
о́тче, въ моли́твахъ твои́хъ благопрі́ятныхъ къ
Бо́гу, превозно́симоу во вѣ́ки.

Лице́ Христо́во пресвѣ́тлое и превожделѣ́нное
созерца́еши, святи́телю, и со святи́ми
предсто́йши престо́лу Го́спода Сла́вы,
просла́вльшаго тя́ на небеси́ и на земли́: на
небеси́ блаже́нства райскаго наслажда́еши, на
земли́ же нетлѣ́ніемъ и чудесы́ вѣ́рныя
просвѣ́щаеши, приводя́ ихъ къ славосло́вию Бо́га,
превозно́симаго во вѣ́ки.

Яко́ алава́стръ враче́бный и сокрови́ще
исцѣ́леній, има́тъ Ла́вра Пече́рская ра́ку мо́щей
твои́хъ святи́хъ, о́тче Па́вле, но́вый исповѣ́дниче
Цѣ́ркве Ру́сскія, исповѣ́даніе бо́ твоё процвѣ́те
нетлѣ́ніемъ и чудесы́, и си́ми я́сно
свидѣ́тельствуе́тъ, яко́ благоуто́дно бы́сть Бо́гу,
превозно́симоу во вѣ́ки.

Богоро́дичень: Пречи́стая Богоро́дице Дѣ́во,
въ Пече́рстѣй обите́ли Твое́й садъ духо́вень
возрастѣ́вшая преподо́бныхъ о́тець, чудесы́
просія́вшихъ во все́леннѣй, въ ни́хже и Па́вель
святи́тель просла́вися да́ры благода́тными,
умоли́ съ ни́ми покланя́емую Тро́ицу,
помі́ловати на́съ, обнища́вшихъ грѣ́хопадѣ́ньми,
и не лишѣ́ти спасѣ́нія вѣ́чнаго.

ПѢСНЬ 9.

Ирмосъ: *Бога человекомъ невозможно видѣти, на Негоже не смѣютъ чини ангельстии взирати; Тобою бо, Всечистая, явися человекомъ Слово воплощенно, Егоже величающе, съ небесными вои, Тя ублажаемъ.*

Ада и смѣрти побѣдитель Христосъ, по смѣрти нетлѣниемъ тя почтѣ, святителю приснопамятне, симъ показуя, яко душа твоя жива во вѣки о Господѣ пребываетъ, въ блаженствѣ невечернемъ святыхъ; егоже достигнути, отче, и насъ сподоби твоими молитвами.

Великаго въ добродѣтелехъ, великими чудесы Богъ тя прослави, святителю Павле, явивъ намъ твоя нетлѣнная мѡщи во врачевство недугомъ душевнымъ и тлѣснымъ, имже усердно поклоняющесе, тя, заступника нашего, по долгу ублажаемъ.

Любовію тя воспѣвающихъ, святителю блаженне, и чествующихъ усердно твою святую память, не лиши предстательства твоего небснаго: искушенный по всяческимъ, и намъ, искушаемымъ, помози, да тя немолчно ублажаемъ.

Богородичень: **А**ще и много согрѣшаемъ, но не отчаяваемся покрова твоего, Владычице, Споручнице грѣшныхъ и Взысканіе погибшихъ

отъ насъ именуемая, по достоянію Твоего къ намъ милосердія; тѣмже возри на насъ Матернею любовію, и возстави отъ паденія грѣховнаго, да Тя, Помощницу нашу, немолчно ублажаемъ.

Свѣтилень:

Звѣзда пресвѣтлая, отъ Тобольска въ Кіевъ пришедшая, являешия вѣрнымъ, святителю отче нашъ Павле: сіяніемъ бо чудесъ твоихъ, всѣмъ зарю безсмертія ясно показуеши, и человеки ублажаеши преобидѣти сладкая, да возмогутъ, якоже и ты, стяжати возмездіе небесное и вѣчную славу святыхъ. **[Дважды.]**

Слава, и нынѣ, богородичень:

Госпожѣ Богородице, христіанъ Заступнице, помилуй насъ, грѣшныхъ, и въ добродѣтели укрѣпи, соблюди насъ Твоимъ покровомъ, да наглая смѣрть не похититъ насъ неготовыхъ, и доведи насъ, Дѣво, въ горнее Царство и вѣчную славу святыхъ.

На хвалитехъ стихиры [на 4], гласъ 5.

Подобенъ: Радуйся.

Радуйся, святителю всечестне,* Павле богоносне,* Владыки Христа тайнниче и учениче,* вѣренъ Ему до конца пребывый:* тебѣ бо, отче, ни скорби, ни гоненія* не отторгоша

отъ любве Христовы,* юже исповѣданіемъ и
защитою правилъ Цѣркве* ясно
свидѣтельствоваешь еси,* тебѣ нынѣ заступника
имамы на небеси,* угодниче Божій,* и съ вѣрою
тебѣ молимся:* подаждь намъ отъ дѹха ревности
твоея по Бозѣ,* укрѣпи ны непоколебимы въ
Православіи,* и молися Христу, даровати намъ
вѣлію милость. **[Дважды.]**

Радуйся, главо освященная,* разума
божественнаго преисполненная,* Дѹха Святаго
благодатию пріосѣненна:* твоего подвига
доблестію* вся ны поучаеши, отче,* ничтоже
предпочитати паче любве Христовы,* и
вѣрности уставомъ святыхъ апостольскихъ
Цѣркве,* ихже ты вѣрный поборникъ былъ
еси,* скорби претерпѣвый правды ради
Божія.* Преклонися нынѣ къ молитвамъ
нашимъ,* святителю богомудре Павле,* и научи
ны твоему богомудрію высокому,* да возможемъ
вѣрно совершати заповѣди Христа Бога,* Егоже
моли даровати намъ вѣлію милость.

Радуйся, архіереомъ божественное
удобрение,* красото Цѣркве Русскія* и Лавры
Печерскія прісное радование:* твоими
священными ученьми* и образомъ житія твоего,
святителю Павле,* вся вѣрныя просвѣщаеши
благодатно,* и къ славословію Бога
приводиши,* яко въ наша послѣдняя

лѣта,* таковаго свѣтільника и чудотворца намъ дарова,* въ нетлѣнии почіющаго* и цѣлебныя струи обильно источающаго.* Тѣмже памѣять твою святую вѣрно совершаемъ* и молимтисѣ прилѣжно:* моли Христа Бога, даровати намъ велию милость.

Слава, гласъ 6:

Святителю богоблаженне, столпе Церкви непревратный, поборниче Православия, отъ утра жизни твоея на страже благочестія стоялъ еси, и до вечера смертнаго въ подвизѣхъ духовныхъ неослабно пребывалъ еси, отче нашъ Павле, Царствія Христова наследниче и Богомъ прославленный чудотворче, не премолчи вопія за ны ко Господу.

И нынѣ, богородиченъ:

Никтоже, притекаяй къ Тебѣ, [посрамленъ отъ Тебѣ исходитъ, Пречистая Богородице Дѣво, но проситъ благодати и приѣмлетъ дарованіе къ полезному прошенію].

Славословіе великое. [Ектеніи и отпусть.]

НА ЛИТУРГИИ,

Служба **вся** **общая**
святительская: [Блаженна, **отъ** **канона**
святителя пѣснь 3 и 6. Прокименъ, гласъ 1:

Уста́ моя возглаго́лють премудро́сть,* и поуче́ние се́рдца моего́ разу́мъ. **Сти́хъ:** Услы́шите сія́ вси язы́цы, внушите́ вси живу́щии по вселе́ннѣй. **Апо́столю ко Евре́омъ, зача́ло 318.** **Аллилу́ія, гласъ 2:** Уста́ праведнаго поуча́тся премудро́сти, и язы́къ его́ возглаго́летъ судъ. **Сти́хъ:** Зако́нъ Бо́га его́ въ се́рдцѣ его́, и не за́пнутся стопы́ его́. **Ева́нгеліе Іоа́нна, зача́ло 36. Прича́стенъ:** Въ па́мь вѣ́чную бу́детъ праведникъ, отъ слуха́ зла́ не убой́тся].

Источникъ: Пече́рская Миніа. [Ча́сть вторая.] — Кіевъ: Въ типографіи Кіево-Пече́рскія Лауры, 2007. — С. 128-143.

